

味  
水  
軒  
日  
記

味水軒日記卷三

明秀水李日華著

萬厯三十九年辛亥歲正月晴爲邵伯承作先嬾庵記  
二日出賀岳青門年伯生孫 夜雨

三日雨

四日海鹽喬令君來顧談日本併琉球事言中朝旣累  
世受其朝貢不宜置之不理卽力不暇勤兵亦宜於  
海島附近處稍安插之令奉宗廟血食以俟琉球臣  
民之忠義興復者而爲之策應是在督責閩廣二撫  
臣不宜噤不發聲使遠夷謂中國不足倚也又言福  
王府五六年不報完工言路諸公亦宜說破喬君偉

然丈夫其議論如是

五日雨不止

六日晴

七日郡南門火二十餘家

八日

九日

十日

十一日數日皆與匠氏量審繩墨圻者較度高卑豐禴相知者咸勞苦余且笑余平生癖癩而今竟何如余解嘲曰余所厭者登壘之跂夏畦之勞耳若夫塗墍樸斲且將竭股肱誠未見其憊也

十二日

十三日

十四日

十五日

十六日連夜月色如晝

十七日

十八日疏雨

十九日過沈純雅觀定武蘭亭又褚摹白素本及李龍  
眠蕭翼賺蘭亭圖有雲西珍藏印記曹氏物也又龍  
色米芾之印此卷絹素沈古然余不敢定其真僞夜  
始聞雷

二十日

二十一日雷雨

二十二日

二十三日陰雨

二十四日雪屋瓦皆白一冬所無也

二十五日霽

二十六日

二十七日

二十八日

二十九日

一月一日

二日俱陰雨

三日霽

四日

五日飲鉏三穗墨芝堂

六日晴朗連日俱點讀楞嚴經有味郁伯承引僧閒閒者來云參看萬法歸一話三年頗樂靜定然終不能除礙膺之物余勸之且讀楞嚴經

七日作周彥雲中庸發覆編敘

八日小雨有寒色

九日晴嘉樹堂玉蘭盛開

十日人持視漢玉貝壘一金剛子數珠一滲銀佛一明

步三  
眼石眼掠一蟠螭古銅書鎮一梅花道人竹譜卷一  
勘係詹仲和僞筆

十一日同潘見源地師往祖塋相地

十二日上海門生蔣楚白率其姪孫起秀字中翹起榮  
字中芳來拜謁以錢鶴灘先生集爲贄

十三日

十四日

十五日

十六日連日點讀禪集

十七日客持示陳白陽米景題云蕭蕭風雨晚來多江  
上漁翁未解簑撐入蘆花清淺處且圖安穩避風波

秋水秋山徹骨清幽人常自結殷勤俗情原與閒  
情別倚興來觀隔浦雲 白陽山人復題

十八日

十九日

二十日至朱家樓送沈少湖葬

二十一日

二十二日作金明寺建造禪堂疏文

二十三日晴暖

二十四日

二十五日雨

二十六日霽殯亡媳沈於祖塋東屋



二十七日夏賈持示馬遠梅譜十八葉趙文敏山水一  
軸樹石皆秀潤

二十八日

二十九日

晦日

三月朔日與賀伯開醴錢放生於楞嚴寺

二日登雪舫往姑蘇夜泊吳江北郭

三日泊姑蘇驛嘗新茶暮雨風撼舵牙徹夜

四日雨

五日

六日五鼓由姑蘇解維晷時抵家

七日

八日

九日譚愚公以董思白倣黃子久富春山圖見示筆意亦鬆活松人效者不能也 石塔頭民居火二百餘家

十日

十一日俱晴朗

十二日

十三日王懷我同年寄龍井新芽二甌至

十四日

十五日

十六日赴吳郡公宴同席者李伯兄曙庵毛海澄令成  
菴顧侍御海陽巨進士存峯

十七日餞高少江儀部於北津

十八日

十九日雨姚大理羅浮其弟心源隱君沈岳翁沈內兄  
翠水小集湖舫暮雨

二十日

二十一日

二十二日晴過張霄雨齋頭嘗隣酷甚甘滑霄雨出素  
卷爲作米山盈尺題一絕云沈水香酣罷讀書墨花  
飛濺玉蟾蜍雲沙千里湘西夢只在晴牕一卷舒

二十三日夏賈出吳氏鞭竹塵尾傳觀其形如閭中龍  
蝦彎曲相就其堅如石其色如黃玉上端受棕尾處  
菌縮齟齬有類蓮蓊花跗者五六莖真異物也余二  
十年前目覩吳伯度以十二金購於吳人周丹泉丹  
泉極有巧思敦彝琴筑一經其手則毀者復完俗者  
轉雅吳中一時貴異之此物乃丹泉得於所交黃冠  
者必深山窮谷結根石上野火焚燒犢子觸突浮脆  
悉盡霜荻獨存偶爲辟穀餐芝者所見遂摩挲露奇  
耳伯度已作九原下人此物不殉竟爲盧兒婢子偷  
易米肉可歎也

二十四日

二十五日鉏伯穀招看苜蓿青紅紫白爛然如錦坐客  
王太僕性靈巧能採霜瓠就形似作種種玩物花罇  
香爐俱濟實用又得小葫蘆拇大者剖開各半用漆  
液紙糊其裏中容滴水養花挂紗巾中花不蔫而意  
味甚巧異其家一綠萼梅偃蹇覆庭可容燕几三四  
花開率五萬餘朵江南所一二數也

二十六日立夏

二十七日小雨

二十八日赴鉏兩岐招賞芍藥女優王鳳臺者演戲頗  
足觀

二十九日

四月一日訪隱者王靜村先生年八十二矣神情矯然  
言論有味歷數平生交厚中有翰墨雅致者諸澎湖  
項少嶽項墨林姚玄鶴沈少湖張翼菴張樵溪皆已  
凋落衲子澤東溪謚定湖黃冠王雅賓山人吳玄鐵  
亦相繼殞沒此老獨存悵然無交閉門對庭梅索笑  
耳尙能細楷如蠅頭出觀所蓄畫文徵仲倣倪雲林  
小景樹石蕭洒題云遠山過雨翠微茫疏樹離離挂  
夕陽飛盡晚霞人寂寂虛亭無賴領秋光 戊午四  
月既望效雲林子徵明時年八十有九

又沈石田小景近樹槎枒石面礚礚上層遠山作半  
嶺左方平坡短橋沙水一曲甚有新意題云地僻人

蹤靜風高木已凋晚山初霽雨新水欲平橋

又姚雲東方幅傲梅道人極粗辣有氣上層半壁高  
嶺下石崖叢木帶沙葦一舟橫其中題云愛此山水  
窟扁舟住亦安樹深天易暝雲薄遲多寒中酒於陶  
近耽詩逼杜難日高塵十丈何處不漫漫仙癡姚子  
二日廣陵僧覺印來求其師夜臺禪師像贊夜臺昔住  
五臺日則宴坐夜則經行遶臺厯五峯皆徧虎狼逢  
之不害深雪沒體凍僵復活虜婦三娘子迎之不肯  
去去歲十月隨人渡海躍入海中盤膝巨浪上爲雲  
霧擁之而去董太史思白已爲作偈陳眉公又爲作  
傳虛其左以須子贊云

三日

四日連晴因督奴子曝畫

五日自余隱角里飲酒不能甘不能苦又不能淡而喜  
冲與冽冲非甘也而覺味之輕以舌之易舉也冽非  
苦也而覺神之清以喉之無壅也於是丙子大講釀  
法春有百花醞夏有蓮露秋有竹葉香冬有雪汁皆  
備冲冽之致余感其意爲作繪以酬之系一絕云家  
住江南楊柳村春來釀得百花樽平生解笑劉伶婦  
酒國同游勝鹿門

六日

七日暮雨



八日赴陸令君招

九日金華邵客持淳熙續祕閣帖寶晉齋全帖二十卷者來觀 爲沈倩繪一便面作巨然筆意題云到處浮滄波今始臨赤岸海月低可拾松風吹不斷高嶺雪嵯峨碎石霞凌亂右軍樂東中蕭洒飛逸翰

十日郡人徐海門者有巧思往來湖海間覓殘碑斷碣裝潢成帖鬻好事者以爲常因精研拓搨楮墨之訣鐫成寶晉齋法帖十卷幾於奪真余購得一部

十一日登雪舫往鹽官夜泊鄭尙書第前

十二日謁喬令君小駐資聖寺令君報謁與岳水部登城隍廟小閣黃冠進茗色如淡金味甚甘冽訊之云

餘杭石瀨山茶也午燕西司同席者姚大理羅浮張  
州將羨陽岳水部石帆徐光祿玄仗夜一鼓乘月行  
至半路稍泊候曉禺中時至王店訪李太學玄白兄  
適沈孝廉天生至同飯談蕭山來姓有巨寇聲息駭  
人玄白因言是月六日有異言服二人各負剪刀一  
又口散之鎮民云其價四分候六月十九日小姐自  
來取人問小姐何人曰我女兒也所散之剪唯及丁  
壯其老弱婦女雖固求不與人見其散剪時執一簿  
籍其姓名人有以僞姓名告者輒曰汝實某人何見  
給乎玄白家僕有二人散剪者皆驍健也驗之剪係  
蕭山所造倏忽半日散迄而去不知何意也申刻與

明三  
玄白別一鼓抵家十三日也

十四日夜雨

十五日治杭州之行夜泊崇德

十六日夜泊北關熱甚

十七日寓昭慶雲山房

十八日謁吳方伯段參知午刻參知來報謁

十九日謁竇廉憲午刻廉憲來報謁

二十日午刻赴三公之招集柳洲亭有柴孝廉家小優  
歌聲杳眇可聽臬幕譚木天送酒盒譚嘉舊令也

二十一日休寧吳爾選太學執贄來謁稱余弟子爾選  
名兆登久寓湖上習業兩中副榜歲僅一二歸省亦

士之篤志者爾選具湖舫飲余其兄止水弟旌卿俱  
在坐歌者呂六云從院中來豐肌委髻如不勝情暮  
與爾選別抵北關登雪舫是日裴潢人湯二引一客  
持物至寓有郭忠恕寒林樓閣圖一卷袁清容跋仇  
英明皇訓子圖一卷唐伯虎桂叢仕女高房山春山  
曉霧碧玉冠尊一古印章銅玉各一

二十二日夜泊石門

二十三日午刻抵家雨

二十四日

二十五日許松寤令杭賈持法帖來看有五代搨本黃  
庭經一本筆畫渾厚兼有鍾法有緝熙殿寶鈴記

右軍黃庭經帖世皆以會稽隆州二刻爲佳行於世者多矣獨未見內司又有一刻本也當時大臣或能得之有緝熙殿璽紙墨搨法俱精真奇寶也友人陳士元重購得之如獲隋珠和璧裝潢成冊示余榮觀觀畢漫識歲月以慶生平之幸云爾時同觀者張堯民蘇邁陸希衡戴澄之傅有慶劉跂馬如龍魏道明也德祐二年丙子冬十一月七日豫章胡承記

琴心玉文洞玄金紐朱錦乃汝傳子能得之可長年楮素纈栗完且堅橫理如髮約兩邊從有赤道如朱弦文居其閒走玄蟻飛雲卷舒相終始天道甚夷非力使無爲自然有至理誰能精專換骨髓明窗之

塵不瑕穢目中有神乃識眞白玉爲軹裝車輪裏以  
天城翠織成仙人樓居儼長生鸞鶴翔舞操援輕子  
能得之慎勿驚宮室之中夜月明上清眞人楊與許  
焚香清齋羅玉女手作此書留下土千年流轉子爲  
主東方蒼龍右白虎廉石子求奕勿與大宋紹熙二  
年辛亥春日林正大觀題

至元庚申正月十八日紫芝生俞和敬觀

有太僕鮮子子固仲穆子昂等印記

二十六日杭客持示唐搢駘教序全碑碑額列七佛像  
甚古樸字畫纖悉具備楮墨皆有古香眞絕品也上  
一印記曰太子太保傳文穆公家藏圖書又句曲半

印是曾入張伯雨鑒賞者碑後列云太子太傅尙書  
左僕射燕國公于志寧 中書令南陽縣開國男來  
濟 禮部尙書高陽縣開國男許敬宗 守黃門侍  
郎兼左庶子薛元超 咸亨三年十二月八日京城  
法侶建立 文林郎諸葛神力勒石 武騎尉朱靜  
藏鐫字 守中書侍郎兼右庶子李義府等奉 勅  
潤色勒石者鈎勒上石也鐫字者用刀鐫刻也潤色  
者修潤字形使美觀也

又蔡天啟做米元章山水一軸 天啟名肇王荆公  
客元章後輩人而師事元章者也蕭閒堂記云選人  
蔡天啟肇相知中語僕若心腹者云得僕於王荆公

蓋僕於元豐六年赴希道金陵從事之辟會公謫居  
始識公於鍾山公門有數十後進喜爭名而相非如  
天啟樂道人善者一人而已 天啟此作大得米法  
峯尖雲氣虛白飛動樹葉漬墨朶朶重複可辨枯梢  
蟹爪鴈喙如篆籀天啟當日親見米老故雄逸乃爾  
襄陽淵源從此可證入矣絹素亦古色可玩題者三  
人 老子風流似米顛戲拈筆墨亦蕭然高情不逐  
時人好妙處當令識者傳牟應龍 陸 林疏秋氣  
早有客夜攻書明月印虛睡天香飄故廬吳興陳康  
祖 絕憶丹陽蔡天啟秋林澹墨意縱橫元章筆力  
能扛鼎可見前賢畏後生癡道人黃公望



子久此題極爲的據俗買僞作米芾二字敗意敗意

二十七日

二十八日購得姚雲東黛筆竹石肆幅蕭洒絕塵之品  
也自題四絕云東塗西抹此瑯玕紙上風煙也自寒  
誰個筍輿無處去只於隣舍覓花看杜若溪頭綠水  
生石崖新竹鬪鮮明匡牀坐此忘歸去卻恨淇園句  
未成竹有清風慣拂塵石閒堪坐紫苔茵微之音響  
今將絕明月相隨是故人平坡兩歇竹陰多葉底枝  
頭鳥似歌桃李蹊閒足游子寥寥此地意如何郁伯  
承從天台雁宕還貽余龍湫茶一瓶淪之芳辣與洞  
山芥兄弟也

二十九日陰雨 人夏未有快雨河流枯澀至不勝舟  
客以戴文進倣夏圭小景一軸宋板李翰林分類  
詩十本初捐真賞齋帖一部質錢去

三十日小雨

五月朔日外家賽神有歌舞 夜雨

二日沈純父先生以綺紗一、鬱林貢葛一選詩約註一  
見貽徵幻住十記序

三日

四日郡中苦旱祈禱甚力

五日暮有澀雨未能破塊

六日澀雨過沈純父先生出觀鄒彥吉畫綠蘿莊圖及

雜畫數種大約自標規格上摹唐宋而不涉元人一  
筆者

七日雨勢盡散治裝往當湖一路桔槔聲栽插十未二  
三苦矣暮抵養白兄家留宿書室庭有盆荷三十架  
已作花清芬襲人

八日蚤謁朱令君令君報謁招飲以方雪禱辭不赴

午弔陸九芝大夫訪同年馬心印州將曹平子節  
推曹堂中素屏有祝京兆草書唐人一絕天矯有勢  
又陳白陽水墨桂枝一幅極有澹韻題云虛庭颯爽  
見秋容白露泠泠月滿空何處妙香參鼻觀及時桂  
子動微風又沈石田阻風圖不真申刻平子來報

謁貽余陝搨智永千文一卷白菰包一白葡萄瑣瑣  
葡萄番米各一封曹與余同舉於鄉中戊戌進士妙  
才高韻以註誤謫邊方量陞慶陽司理假差還里中  
氣味疏宕終丘壑品也夜宿舟中

九日午刻抵家

十日雨

十一日復雨分殖蘭蕙剔去腐根留其吐穎者

十二日周秀巖持姚雲東詩翰來閱有老柏一株屈曲  
凡五折而上淡墨作紐紋焦墨作老苔其襍穢細葉  
則以濃淡之間爲之甚有氣韻梅道人之流也自題  
云莓苔老幹閤青銅香葉紛紛細細風蜀相祠前行

脚到賺將黛色上圖中 行脚僧家事豈寫以貽禪  
伯者耶 又寫生一卷作辣芥蘿蔔老菘三種題云  
既有辣芥亦有盧服山廚之閒倘我餽粥餽粥固薄  
此味實長願言卒歲飽食徜徉懶仙 又系數絕書  
法酷摩張伯雨 小畦高壘北園深菜雜青紅帶夕  
陰湖上幻仙閒想象百年能契丈人心 貞居晚號  
幻仙 貞居雜菜味何深漫自題名附漢陰抱甕不  
辭爲圃戒開圖方見寫生心 先生曾爲傳冰壺我  
愛貞居只寫圖欲問當時靈石塢可憐故老眼中無  
夜讀山中外史詩興來握筆寫烏絲一圖菜品收  
多少絕勝園公采肉芝 癸卯正月四日藻具紙來

對雪呵凍爲書于白雲枕書窩時疏櫺寒光爍老目  
因草草也逸史用趙松雪風字研張文寶兔毫筆  
藻者蔣生文藻雲東書畫弟子也號林塘味此數詩  
似張貞居有寫生卷作此菜品而雲東特倣臨之耳  
十三日晴農望未浹

十四日古虞葉曜字士明介雲麓兄書謁余以袖珍漢  
雋一部手鐫名字印章各一貽余

十五日門生蔣楚白饋中山酒二罇爲譚孟恂圖扇  
倣趙松雪小景頗秀發題云遙岑碧煙古木翠雨蘭  
露滴瀝桂風飄拂招搖列仙俠侍玉女琴餘酒半瑤  
瑤見齋

十六日蔣楚白具湖舫招飲譚愚公間仲昆季亨兒同坐二鼓罷去

十七日愚公挈僧道可者來午赴岳石梁招

十八日雨是月十一日平湖柳口民張姓婦一產三女二男母子俱死是月七日新市一民家婦一產五男母子俱生孳子不足爲異累數至五幾同犬豕又俱見於一邑不知何祥也餘杭門生高淑陶從漢中回貽余秦涼葡萄脯皖鱖酢川椒陝搗右軍聖教序懷素草書千文顏清臣爭坐位帖歐陽率更多寶塔顏書千福寺碑皆佳

十九日雨得同年余立吾僉憲書寄余酒貲多兩東坡

洋州園池詩木本一帙 屢觀我貽余稽瑞錄廿冊  
英風記帖肆本香雪酒十年蔬四韻

二十日高君燦指引一人持祝京兆草書唐人律詩一  
卷筆力雖蒼辣然無秀韻枝山落筴也 爲門生許  
叔重圖扇倣黃公望題云絕壁晚霞籠薄赭高松老  
翠入青冥頗有奇趣 午赴譚孟恂招共泛湖舫維  
黃孝廉莊雷雨未快

二十一日出謁平湖朱令君於沈家行舟次

二十二日同徐德夫岳之初之律謁王兵憲岵雲是夕  
宴於德夫宅

二十三日



二十四日

二十五日俱大熱

二十六日午刻雨有白龍下飲於鴛湖

二十七日蔣楚白引其兄國璵字萃懷者來執贄稱弟子

二十八日大雨

二十九日

六月朔日家君誕日卻觴不御避東塔禪堂放蛙千數  
二日有賽神之樂

三日大雨漳蘭分殖後擢葩肆莖凡三十六莖移置飲  
食壽康處終日旖旎與細君兒女輩共之

四日客攜示倪雲林樹石遠岫圖下作漫坡疏排十一  
樹左四樹一窠右三樹一窠又右二樹一窠中二樹  
一窠皆挺瘦昂直下通而上掩遠山微茫隱其閒此  
古人所謂窠植法也自南宋院體布置結構絕去天  
巧與民閒士俗好尙率以層巒疊嶂爲工而此法不  
傳如髮矣非迂老天縱真逸豈復令後人得覩此邪  
摩挲諦詳爲之神躍 迂老題云余嘗見常樂佛因  
地圖山林木石皆草草而成迥有出塵之格而意態  
畢備及見高仲器郎中家張符水牛圖枯柳岸石亦  
率意爲之韻亦殊勝石室先生東坡居士所作樹石  
正得此也近世唯高尙書能領略之耳余雖不敏願

仿像其高勝不敢盤旋于能妙之間也因新齋高士  
持仲傑周君紙素來需僕寫樹石遠岫故云至正己  
亥六月十四日瓚

又石田摹雲林溪山一橫幅自題云虛亭帶遙山絕  
澗鳴疏林山水只如故倪迂邈難尋景物自千古寥  
寥無知音目送飛鳥盡塊坐停瑤琴 此幅假

五日夏賈持示洮河卵石硯高八寸闊三寸形如枕瓜  
色如水蒼玉入手瑩滑試之與墨相昵紫雲碧煙疊  
疊彌布絕佳品也云得之婁江王司寇元美物也匣  
有鐫字轉鬻者慮留蹤影因留匣漫滅之夏索余畫  
因許留硯齋頭不遽取也余按趙希鵠博古明辨云

石在臨洮大河深水中不可漉取得之者以爲希寶  
格古要論又云有火點者佳今驗此硯有火點二  
午赴許伯厚嚴蓋夫陸三孺項子蕃許叔重馬永叔  
湖舫之招熱甚

六日方丈室以米搨九成宮虞書孔子廟堂碑聖教序  
李北海雲麾將軍帖又館本十七帖又吳匏菴楷書  
書目一本又祝京兆臨鍾書四表又石田粗筆山水  
一文五峯青綠樹石一王叔明澹溪草堂圖一質錢  
去祝卷極佳十七帖青李來禽二十字俱草與修內  
司勅字本異不知何也且其筆多勁怒豈唐人臨本  
耶 暑甚岳媼病瘡內子歸省余散髮謝客有索行

草者漫成閨體二絕應之 帳挂玄綃煙霧輕水晶  
方枕簟波平峽雲不動高天迴夢繞芙蓉九疊屏  
晚妝初卸月華流荳蔻湯溫膩粉柔暗簇蘭芽青鬢  
裏賺他蝴蝶上搔頭

七日吳伯乾貽余丁南羽繪觀音一幅上有莫秋水題  
贊字做褚令哀冊

八日

九日

十日

十一日過普善菴訪吳伯乾不遇

十二日

十三日

十四日連日焦灼

十五日赴三塔放生會午後雨

十六日風雨如深秋虛堂無事因出所藏元人六逸妙蹟展觀之一趙子昂枯株嫩篠石學宋徽宗有生氣款云子昂爲成之作二馬文璧盈尺山水千巒萬壑窈窕倩深絕奇品也款云春山清霽至正丙午歲春正月望日馬文璧畫於書聲齋書法用急就三倪雲林安處齋圖下層作岡麓漫坡樹三一枯柳一皂枯一枯杞意極蕭散屋二在樹根麓趾石法俱用勾勒取勢淡墨暈其稜複處濃墨點苔如遺粒可數此倪

畫作法之極異者余平日見迂畫不下三四十幅如此幅畫法僅一見耳元人目雲林繪事謂之減筆李成營丘本學李思訓句勘思訓法也迂翁神明其道故以點墨代丹綠而氣暈益飛動如此古人胷次可輕測哉 倪自題云湖上齋居處士家淡煙疏柳望中賒安時爲善年年樂處順謀身事事佳竹葉夜香缸面酒菊苗春點磨頭茶幽棲不作紅塵客遮莫寒江捲浪花十月望日寫安處齋圖并賦長句四趙善長陸羽煮茶圖林樾蒔翳閒一草堂角巾高士趺坐木榻童子篝火案有罍洗茶具筆法蒼恣久視服其老手有題句云睡起山齋渴思長呼童煮茗滌枯腸

軟塵落碾龍團綠活水翻鎗蟹眼黃耳底雷鳴輕著  
韻鼻端風過細聞香一甌洗得雙瞳豁飽玩苕溪雲  
水鄉窺班五方方壺小景老筆縱橫酷意摹董元者  
六林卷阿山水橫卷卷阿畫不甚著名纖眇有黃鶴  
家風氣以細楷題其端云癸丑冬閏十一月訪遠齋  
副使於竹崎談詩論畫因道余師方壺公及孟循張  
先生迺知用行與二師相周旋好古博雅尤精書法  
日與雲林倪公善長趙公游戲翰墨之場令人慕羨  
心同千里晤對故余寫此爲寄便中萬求妙染并二  
公名畫一二見教以慰懸情優游生林卷阿 觀此  
則卷阿乃方上清弟子亦一黃冠也



十七日大雨竟日暮宋搨聖教序頗見當時用意處  
十八日雨不止溪河驟漲三四尺雨勢所不及老農云  
遠山谷中必有蛟蜃發洪之變

十九日

二十日晴訪岳之律因袖祝京兆臨鍾太常四表卷與  
之律易祝行草雜手簡一卷歸咀味之覺其天真爛  
漫唐宋諸名家咸在筆端亦有直逼大令者唯右軍  
法少耳簡凡八方前七方與子容與其父號約齋者  
不知何人也大抵皆託其借書鈔錄語不雜他事所  
借書天寶遺事南部新書能改齋漫錄畫墁錄吳船  
錄騷鸞錄揮麈錄古杭夢游錄述異記集異記灌畦

暇語文體樞機說郭江文通集白氏文集清異錄靈  
怪錄雲仙散錄計一十八種且囑云亦須整齊端楷  
蓋自蓄之品故耳 古人勤勤好學不倦如此自然  
取精日多胷次日拓偶爾落筆氣已空羣豈徒沾沾  
在指腕閒較工拙哉

二十一日作三塔寺重脩大悲殿募緣疏

二十二日

二十三日

二十四日出謁江西藩參胡公於北津

二十五日雨連日氣如深秋夜御單衾

二十六日

二十七日大風雨爲項于蕃圖扇又作一小幅題云峯頭木末任從容登陟從誇健似龍盡斥羣山襟帶下自將雙耳領松風

二十八日雲陰幕穎井稊帖纖瘦飛動純以筋骨取姿此如休糧仙人縹緲鶴背之上令人可望而不可扳攬非洞精書法窮歲研磨未易得其關鍵也徒欲凌蹠效顰則綿弱詭異種種惡態從此生矣 按黃山谷嘗論洛下張景元龍圖所藏云斷地所得初號杵蘭其字輕瘦勁健與定武本不可高下神氣飛動尤覺天成識者云此真褚河南所臨也自是易名褚蘭猶憶靜躁諸字妙處不能形容此豈卽其遺耶抑數

傳猶隆準者耶

晦日立秋淫霖徹夜連日皆大風

七月一日

二日大風雨城中垣屋倒壞者百餘處

三日

四日連雨海鹽海塘毀四十餘丈

五日稍霽同徐德夫岳之初項孟璜設席燕饗使者張

公

六日

七日

八日

九日往吳江夜泊長橋

十日介盛寓庸顧脩吾沈伯榮執幣求姻於沈都憲太素家太素之從弟號洪字名令言者盛服行事午刻余解維是夜泊八尺

十一日未刻抵家

十二日會飲於徐德夫第客言是月二日之雨松江杜完三給諫以冊封回南經過鎮驛舟中見七龍下飲於河青白黃碧諸色燦然鱗甲髻鬣皆可數惟不見其首耳易云見龍無首非虛語也

十三日訪許廣文靈長出觀沈石田綾畫長卷筆法學梅道人自題云余生平喜作山水漸爲人知逼索至

終日以此應酬而不能闖入古人之藩籬良愧今日  
既登天平絕頂盡見吳中佳山水歸舟吐此不能萬  
一豈天成者終不可以筆墨追歟時年五十六歲  
十四日客持褚登善陰符經行書墨蹟來玩紙色閭慘  
筆意拘局非真品也有三跋 褚河南書法爲唐朝  
一代冠冕世傳哀冊枯樹賦蘭亭聖教序等帖至今  
爲臨池指南此陰符經乃奉旨所書知爲用意者觀  
其天機逸發多法右軍世之人徒見其所書與右軍  
類者遂疑之殊不知先哲有兼人之才而其作字初  
不拘一體使其觀此必將吐舌而走矣眉山蘇軾跋  
褚登善之書凡三變初師虞永興中學鍾元常晚

入右軍之室故唐之能正書者僅二十八人而登善  
居二三之閒此卷溫潤視右軍最爲逼真誠希世之  
寶也當謹其傳焉大德丁未秋九月望日御史中丞  
楊肩載 褚河南所書蘭亭聖教序枯樹賦等帖無  
不精絕獨此陰符經尤爲墨香浮溢韻采驚人披玩  
之閒不能釋手因題永樂十五年十月望日書於抱  
一齋雲閒沈度 是日北郭門內顧姓者一家五人  
被賊殺死而賊未獲亦大變異也

十五日購得文徵仲蘆蟹逸筆有致又王西室擘窠書  
唐人二絕亦雄邁似夔子山

十六日奉家君挈兒子上沈岳翁七十壽

十七日客持示一古硯色赭四沿有溝塹多缺蝕印之  
無韻是唐

十八日

十九日俱大熱

二十日曝書檢得杞菊老人存古錄記褚河南臨大令  
飛鳥帖柯九思鑒跋 臣獻之頓首言今十二日辰  
時中使宣陛下睿旨俯詢字學之由仍賜臣玉璽牋  
令臣小楷親疏以入臣仰承帝命密露天機昧死有  
言狂率待罪臣年二十四隱林下有飛鳥左手持紙  
右手持筆惠臣五百七十九字臣未經一周形勢髣  
髴其書文章不續難以究識後載周以兵寇衝斥道



路脩阻乞食揚州市上一老母姓沈字光姜惠臣一  
殮無以答其意臣于匙面上作一報字令使市貨近  
觀者三遠觀者三未經數日遂獲千金臣父義之字  
法爲時第一嘗有白雲先生書訣進於先帝御府蒙  
眷獎過厚錫予有加而臣書畫不逮父祇益慚愧所  
有書訣謹別錄一本投進宸宸伏乞機務燕閒留神  
披覽不勝萬幸臣獻之頓首死罪 杞菊云事奇故  
全錄之余以爲此妄庸人僞作也大令文筆高華語  
氣旣鄙俗不倫且晉元帝諱睿而曰睿旨何也登善  
博雅風流寧不辨此而臨之耶總是金元時無識庸  
人僞造以欺其主如指蓂莢以爲樹生之類耳孫虔

禮不信筆陣圖爲右軍物矧此又其紕陋者也

二十一日休寧門生黃寅甫持一破碎畫幅來贈云是郭熙桃源圖然極視之竟不能了且不復可料理矣因謝還之

二十二日周霖望廷評以所著大學遵古錄來相示且乞序

二十三日諸生以其祖滄湖公行書陶詩一卷計十一首來玩書法酷倣古千文古千文者相傳羲之臨魏鍾繇書其語與周散騎相出入書類李北海柳誠懸蓋亦唐人庸妄者僞託之耳滄湖名夏以歲薦老篤意筆墨與項少岳戚中岳諸公友善其書有功力而

識韻不超 前有篆書澎湖墨妙四大字許初字元

復筆

二十四日

二十五日往魏塘夜宿東岳行宮客云嘉善便民倉左側濱河堤岸下今歲五月中忽涌泉涓涓上出接之終日僅能盈缶味甘寒之極今沒水中水涸時必能遠致一二缶當絕勝幽澗也余方遣舟往惠麓聞此躍然

二十六日在東岳行宮陳羽人房索書者勢集洒汗爲揮八扇夜返棹三鼓抵舍

二十七日甚熱

二十八日過范長康見舞蛟石翠蘿蔽翳颯有清風長  
康劇談金陵交游閒事時一拊掌午後甚熱三伏時  
所未有也

二十九日人以陳白陽墨荷一幅質銀去筆法草草天  
真爛然得徐熙野逸之趣自題云波面出仙妝可望  
不可卽薰風入坐來置我疑香室書態狂縱類蘇滄  
浪

晦日大雨

八月朔日運惠麓水二十五罈至 嘉善茂才葉汝茂  
丁巖德執贄來稱弟子

二日集沈翠水可月軒

步三  
三日過馬雲將舫齋出觀趙千里散牧圖凡作七馬驂  
驪駒赭白雲錦熒然偃伏齟齬亦種種盡態佳品也  
又文徵仲小幅山水作寒林遠瀨上一峯森秀之極  
乃於畫背裱紙上率意所成故爾臻妙自題一絕云  
天空木落思悠悠水淨煙明見遠洲偶向晴牕閒點  
筆被人呼作李營丘亦雅自負矣

四日會講於仁文書院

五日池灣沈仲貞乞殯勝齋近藝序

六日同姚羅浮岳之初之律集湖舫餞徐勳寺立仗還

朝暮雨

七日作楞嚴寺法雲房募蓋觀音文昌堂疏

八日作女貞篇爲鄭母董夫人賦

九日

十日往白芑村齋

十一日

十二日復會仁文書院宜興史給諫玉池先生主講席  
十三日過沈純甫先生歛吳爾選門生來 夜月色如  
晝

十四日

十五日招吳養中蔣魯完楚白許叔重馬永叔小坐是  
夜月色綏燁

十六日細雨陳白石鈔寄余陳眉公求忠祠記載方遜

志抗命時魏澤以刑部尙書謫寧海尉捕方氏幼子  
德宗方九歲澤匿之有台人秀才余學夔者乞食翔  
於市口喃喃唱歌以諷澤澤心動叱曰扶顛子去越  
兩日途遇歌如前澤知其義士密託德宗於余入松  
江島嶼中厯青村諸鎮以織細資米得活余又潛入  
郡屬祠部郎俞允護翼焉時任勉爲參政家居聞之  
就見德宗德宗初引卻勉出癸酉錄示之知勉與允  
皆門生始安允妻以養女冒俞姓恐同姓賈禍旋改  
余轉遷白沙鄉而學夔亦遂遁去不得跡矣德宗三  
子友直友諒繼許生者友竹子孫繁衍居華亭萬厓  
己酉督學侍御楊廷筠檄郡立祠

十七日候雨候晴秋氣極佳

十八日夏賈從杭回攜書畫來看無甚佳者 黃大癡

溪山蕭寺款云至正庚寅九月十一日大癡作非真

陳沱江梅竹雙鉤寫意極瀟灑款云嘉靖丁巳沱

江子陳枯寫 文徵明赤壁圖絹本不真文休承書

前賦行草相閒筆筆學長沙有揉鐵裹針之妙世眼  
不知也 吳文正行書當三錢大在金粟紙上乃二

律詩句亦佳大舶西來趁晚潮留雲亭上興飄蕭水  
從澹潏流偏急春到崑崙雪未消萬里京師瞻北極  
一朝人物慨南朝中冷入口平生足坡老詩名已命  
騷登金山與客來嘗第二泉山僧休怪苦相煎結菴



正在松風裏裏茗還從穀雨前玉椀酒香揮且去石  
床苔厚醒猶眠百年重試筠籠火古杓爭憐更瓦全  
登惠山弘治戊申春日辱石田先生過書以博笑通  
議大夫吏部侍郎延陵吳寬書倣坡公之學季海者  
渾厚可喜

十九日梅墟周表叔七旬誕日扶家君率兒子往稱觴  
以陳白陽畫古檜水仙圖爲壽家君題其上曰老檜  
煙霞骨幽花冰雪姿本根互被覆枝葉相扶持如我  
老兄弟白首同棲遲露滴天酒味雲含碧蘚滋收爲  
萬年藥笑傲樂清時 是日雨

二十日小霽作省吾居士贊居士新安人姓吳以什一

起家有隱德其子從人乞文有人僞作余手書贊應之者族人吳兆登余門生也辨之因轉乞眞者以去冊用松江研光綾書字晃目極助神采

二十一日

二十二日晴暖得高同年少江書知余乞養疏以七月二十日封進會極門至二十六日 旨下部

二十三日

二十四日

二十五日

二十六日晴暖

二十七日朝霧熱甚家君往枵嚴禮懺

二十八日小雨作小景長幅應王學博崑星之求王越人余鄉薦同年也爲題句云秋花籬落暮雲天越國溪山妙若仙不是官忙渾忘卻未曾椿得買山錢

二十九日

九月朔日雨

二日大雨北僧東明者以達摩像索贊先有人贊其上  
方余書贊於其趺下曰江浪踏飛蘆嶺雲攜隻履花  
果後來繁葛藤由爾起別人當爾頂門上喝采我卻  
向爾腳根下著語且道著個恁麼語咦笑爾傳衣六  
葉後赤體堂堂無片縷

三日霽客持示謝樗仙時臣古木疏篁極有氣韻彷彿

類石田自題一絕云疏篁落木款清秋十載平泉是  
舊游入夜挑燈潑狂墨西風黃葉起汀洲 又作二  
松一俯一仰有怪勢題云大夫廊廟具高蓋逼蒼旻  
一操固無侶千秋生茯苓 此二幅極是謝傑作樗  
老聲值遠在相城下觀此有駸駸欲度意未易凌蔑  
也 又橫卷高八寸長二尺餘縑素上作細竹煙瀨  
筆意縹緲石法圓渾秀逸沙嘴碎礫點綴有濛濛閒  
想必是元以前畫手妄庸兒題作王孟端上方題者  
五人唯末一首號夢草者佳 蕭蕭萬竹半臨溪老  
眼看來忽欲迷恰似黃陵廟前雨春陰一片鷓鴣啼  
夢草

四日郡邑大夫會仁文書院

五日陰晦

六日雨

七日雨作周彥雲大學遵古錄序

八日小霽書賈載新鐫諸書來求售偶挾錢磬室一小幅草草溪山滋有勝韻自題云疏林含宿雨遠水帶斜汀策杖度危磴秋色在虛亭庚戌秋日爲慈雲上人寫錢穀得得臨溪路陰陰溪上林攜琴向何處日暮少知音文彭萬頃春波碧浸天滿堤春樹綠紫煙濛梁盡日稀行客閒看沙鷗作對眠袁尊尼

匡廬山人

九日霽沈倩伯遠餉黃雀四十頭肥白鮮脆得味之蚤  
者夜飲爲傾二缶屠賓陽以新刻荆川史纂十函  
見貽余有舊刻二部適湖賈操舫至余以易松刻稗  
史類編等書

十日周伯昇之戚施姓者爲崑山丞歸橐有二卷索得  
研觀之劉松年四皓圖作長松二株盤石夾路一  
人冠劍漢裝肅揖其留侯所遣使耶一老曳杖行松  
下三老相圍坐其一手一素卷舒觀之一赤膊童子  
槌背一老橫琴膝上一老箕坐橫卧其杖又二童子  
隱樹閒竊語柯南宮諸人跋之子讀留侯世家所  
謂四人者常高其氣不爲屈辱因帝欲易太子呂后

用留侯計卑辭厚禮招致四人爲太子助此四人亦  
幡然無難色司馬公謂審有此是子房爲子植黨以  
拒父也愚以留侯被劫畫計之日惟用圯上老人設  
變制權之術豈暇顧父子之倫哉然此四人既不爲  
父用肯復從其子有可疑者一也向以帝之慢侮而  
賤不就今從太子見寧必其不輕且罵哉有可疑者  
二也且此四人高蹈遠引宜不役志於物一旦以金  
璧書幣而來有可疑者三也夫其閒可疑者三子是  
以知此四人者必不苟出焉雖然四人從太子遊者  
必有謂其果爲商巖之老乎則余不知也奎章閣學  
監書博士柯九思題 四皓圖跋 呂政苛虐四皓

遂隱入商山及漢鼎已定問高祖素慢儒聘且再終  
不至此其節可嘉也至高祖欲易太子呂后用子房  
計使人奉太子書以往交始一出儲遂定然卒無所  
建明使當時雖太子卑詞亦不出吾將以夷齊比稱  
惜乎其未也春秋責備賢者吾於數子究論焉成化  
大淵獻秋七月沈杰甫 漢高祖晚歲欲易太子蓋  
以呂后驚悍惠帝仁柔爲宗社遠慮初非溺於戚姬  
之愛而爲是謀也蘇老泉謂帝之以太尉屬周勃及  
病中欲斬樊噲皆是知有呂氏之禍可謂識帝之心  
者矣子房曉人也乃引四皓爲翼使帝涕泣悲歌而  
止帝之泣豈爲兒女子而泣也厥後如意以鳩亡惠



帝以憂死向非呂氏先祖平勃交驩則劉氏無噍類  
而火德灰矣杜牧之所謂四皓安劉是滅劉者誠哉  
是言也學士解縉書 宋徽宗鴻鵠圖前有御筆二  
大字楊士奇書楊氏家藏印記君謨紹興小璽宣和  
御筆四字一押开 鴻鵠灘頭狎浪隨君王緋墨慣  
娛嬉淒涼晚歲鴛鴦漂漢雁沙鴻未必知前集賢待  
制馮子振奉皇姊大長公主命題 靈沼靈臺造有  
邦般游未始足音楚誰知春草池塘夢怨入宣和畫  
鳥雙魏必復 月華連水映雙蛾鴻鵠驚分繡藻過  
卻恨前王無紀範空教池館鳳雛多監脩國史長史  
李洞敬題 暖日晴雲浴淺灣幽禽相顧效雙鵠寫

生賴有宣和筆贏得宮闈一笑看儒學提舉陳廷實  
歛衽書 員嶠真逸 生意蟠留賦與真一雙鸛鵒  
狎相親阿微尙記呈祥兆飛下灘來事更神中書平  
章政事張珪敬題 飛來鸛鵒下前灘曾是西臺擢  
豸冠底事宜和圖畫裏只因毛羽入時看集賢大學  
士趙世延敬題 君王遊翰羽毛間只爲深宮盡日  
閒大觀諸臣真解事日無封疏犯龍顏立教大宗師  
吳全節題 世后文王工畫品長縑小幅世爲珍道  
君妙思宗神跡鸛鵒容儀自奪真翰林國史院編修  
官杜禧敬題 北廷西夏勢如山童蔡相歡日宴安  
八葉中原宋天子御教人作畫工看御史中丞王毅

吳越王孫

十一日雨山人俞羨長安期以白著琴琴集見餉

十二日大雨如注

十三日霽

十四日晴朗圃人饋菊黃白紫燦然列檻際今歲夏潦甚苗盡淹死市中絕無担賣者 是日嘗小春茶

十五日夜雨

十六日霽稍寒

十七日

十八日

十九日作孫令弘朴語叙

二十日

二十一日過夏澄源出觀姚雲東枯木幽篠極類梅道人又草書采菱歌一幅似趙吳興黃鶴山樵山水一小幅布置甚委宛樹石學廬浩然而筆擬重膺作也

二十二日

二十三日郁伯承假余范石湖攬轡錄驂鸞錄吳船錄三種皆紀游之語覽之一過東西南北數千里山川古蹟如指諸掌而一時寒暑晦明亦若開歛其閒奇書也

二十四日連日晴朗有佳思

二十五日譚孟恂聞仲從金陵回云留都私錢盛行府

尹陸津陽出示禁止姑令私錢折官錢每一當二市  
橫不便之故勒鋪行仍收私錢無折法因相與閤毆  
公擒其尤六人將重懲之時操江中丞丁敬所公多  
行惠於閭閻每出必令健卒囊錢散丐者丐者日擁  
集隨其輿所散錢皆私冶也諸丐乘閒以陸禁白公  
公曰官府禁示虛套耳汝輩第行之自若眾因譁咸  
訾陸公候陸出擁其輿諄語幾至於變丁公又爲謝  
罪於諸丐者始釋陸而錢禁弛矣嗟夫冶鑄國柄也  
竟爲民所盜京尹尊臣也竟爲丐所辱而丁公以蕭  
娘呂姥之態偃僕其閒幾挑大釁於輦轂之下時事  
何如哉

二十六日過岳之律之律從武康回稱茗中山水奇秀  
恨不能卜築其間

二十七日徐觀我銓曹來顧以三金爲家君壽且力勸  
余出余笑而謝之

二十八日小雨

二十九日陰雲霽色閃倏未定

十月朔日雨哭沈純甫先生 張倩襟仲出韓郡丞肖  
南公手臨禊帖求跋韓餘姚人平湖籍起家孝廉官  
至蘇州府同知有廉幹居家靖默年七十五矣余甚  
敦敬之然不知其能書也今觀此帖不拘不縱風氣  
自如深得筆先之意公云兩目幾瞽但信指腕不復

自知其合否此公書之所以工也余嘗見虞伯生晚年喪明後書塗糊潦倒而真態溢出彌復可貴良由法度意趣熟爛胸中廢目而一以神行之故有意外之奇耳

二日雨如噴霧

三日陰晦

四日赴方別駕招飲天寧寺漢風閣下午刻余先至憩僧房因過訪勉公淨室茶話久之無期亦至談禪品詩頗洽幽興

五日辨題道可行卷

六日莫沈純甫先生是日先生誕辰也賀伯闇先期醵

相知者數人作文聯屏爲壽至是并納之

七日賀孝延招飲湖舫夜大雨

八日雨

九日沈白生銓邵岳之律太守小集余齋

十日雨霽稍寒上海賈人持書畫來閱四五十卷止一  
二佳者 倪雲林小景一軸全法李營丘近作四五  
樹前坡後石壁平頂隱隱如高臺四畔列奇石遠作  
縹緲峯巒一帶自題一律云來訪幽居秋滿林塵喧  
暫可散煩襟風迴硯沼搖山影夜靜寒蛩和客吟危  
磴白雲侵野屐高桐清露濕窗琴蕭然不作人閒夢  
老鶴眠松萬里心 陳白陽杏花春燕自題云春日



劬書嚮紙窗少年習氣未曾降牆頭忽見杏花發走  
馬何時到曲江春日偶作杏花春燕將寄社中并搜  
舊詩題之白陽陳道復 此卷畫法精細洒逸書如  
盞面豪放類米元章

十一日寒雨竟日

十二日西風甚厲天宇如拭

十三日晴朗

十四日理水仙叢得葩二十餘穗翹出者已奕奕欲吐  
此花候之極蚤者

十五日晴暖夜月如晝

十六日周梅翁以諸子華楷書便面歸余筆意類麻姑

壇子華名夏卽滌湖居士也一而又作墨蘭數葉沈  
子廣引辟穀沈生來見自稱野人沈蘭不知其何謂  
也初游秀水庠中年患蠱隔偶於孤山遇一道者教  
以保氣之法漸有效因棄去習靜腹中氣充然遂不  
思食斷粒凡七年矣亦能閉氣入水中盤坐竟日不  
出對客談久以酒潤吻而已不多飲也聞余節略鈔  
得道藏故特垂訪其他未嘗枉一人也 作先福勉  
公道可詩叙

十七日暮雨

十八日晴

十九日招賀孝延飲湖舫

二十日夜集張嘉林樓居酒味甚醑

二十一日書金湧樓扁

二十二日賦手柳酒三詩送賀孝延北上

二十三日

二十四日與賀孝延集湖舫有酒侑周仙仙

二十五日

二十六日

二十七日

二十八日作寄高永仁徐德夫書

二十九日小盡作合郡鄉紳祭沈都御史繼山公文

十一月一日閩同年徐翰明諱大紳之子一元一貫者

來謁翰明司理吾郡陞寧波郡丞卒官

二日見邸報知余乞養疏部覆在十月十日 歎人程  
用貞名學智者來謁貽柳花詠三十韻求評語

三日夜與二徐小飲大徐字善長小徐字唯吾

四日暖甚眉公先生見過

五日同諸鄉紳奠沈純甫先生

六日

七日張虞懸以閩人冊索畫爲作小米數筆題一絕云  
煙開露沙清木落見人家彷彿相逢處溪名是若耶  
八日暖甚

九日陰晦諸生持示古帖一本標云蘆溝橋集古法帖

載右軍適得書以下諸帖不知刻於何年亦不知有幾卷

十日客攜觀潤州金焦北固三山古今碑刻計百種無一佳者又觀鷄鳴山太廟功臣畫壁圖

十一日徐潤卿同陳衛伯攜三卷過我評閱一趙文敏洗馬圖白楮細描筆法精緊奚官手勒波閒鬃鬣縑縑纏結猶有餘滴盍洗竟欲就陸者子昂自題云齧郝覆駕誰能御驚蹇紛紛何作顧青絲絡首錦障泥鞭箠空勞怨長路明窗戲寫乘黃姿洗刷歸來氣如怒不須對此苦歎嗟男兒白昔多徒步至元廿八年八月廿一日在家道人書 子昂稱在家道人而不

名僅見此 馬項上青絲轡勒川篆筆畫成備剛柔  
二性 憶昔秋風從翠華騰驤萬騎獵龍沙而今局  
脊蓬窗底坐對此圖空歎嗟是年十一月四日自廣  
陵還始償此債養晦當發一笑鮮于樞題 趙吳興  
與鮮于太常同時吳興固遜鮮于助其翅羽觀此卷  
二詩鮮于所謂見其善者機故多姿態子昂所謂見  
其杜德機故多骨力鮮于猶有矜莊之色子昂乃以  
氣吞之故多勝耳董其昌題 竹懶曰鮮于書法度  
極熟用筆極圓勁而少風神子昂鮮豔豐潤而乏骨  
氣此卷書意含蓄古澹似孫過庭孝經行草中雜思  
陵數筆鮮于指頂行楷酷摹哀冊自是兩種意頭董

跋以趙爲氣吞漁陽恐非公論一鮮于伯機行草坡  
公後赤壁賦熟勁有法一沈石田有竹莊小圖石田  
故有有竹莊圖青綠長卷贈史明古者此又重出畫  
法學梅道人荒率簡遠絕有勝韻自題云顛毛脫盡  
野僧如世好都歸一懶除欲博晏眠高著枕圖便老  
眼大鈔書屋須矮小茅須厚牕要清虛竹要疏心與  
陶翁有相得時歌吾亦愛吾廬弘治己酉秋日廷珍  
過我有竹莊賦此系圖以贈 夜聚飲沈倩伯遠家  
馮權奇談項宏甫家有文與可晚靄橫看圖妙甚相  
約索玩 梨園女旦傅生年十七矣風致翩翩金墀  
富人麾五百金圖爲側室生鄙其爲人一夕遁去亦

可兒也

十二日夜集沈翠水可月軒

十三日

十四日哭戴升之升之幼與余同學已同游馮具區先生門下已又同參紫柏姿韻枯澹書法初學蘇子由丙午舉於鄉至是竟卒年五十耳識者悲之

十五日客攜視沈石田水墨花鴨筆法蒼潤有生氣自題擘窠大書客來具雞黍我具能言雌頗肥如秋瓠留飯客莫辭尙愛好毛羽黑白相參差更復存紙影若聞鳴聲悲食品何足惜所重故舊私用昭將行以此致餽聊發解纜一笑



明三  
十六日郡公集鄉紳吏民講聖諭六言於天寧寺

十七日

十八日會殯沈純甫先生於四十二溪之原

十九日長至

二十日寒甚

二十一日作壽應龍濱先生文

二十二日

二十三日連日在美蔭齋前榮負暄自適杭蘭四五叢  
俱吐穎鑽苔而出春候之極蚤者也

二十四日

二十五日

二十六日至金橋金帶村送姻家葬舟沿枯葦淅淅敲  
冰而行晚同姚通政賀吏部集顧完三節推第有歌  
舞

二十七日過姚仲子壁閒一畫絹素沈古筆法蒼酣類  
范寬題云謝縉不知何許人也

二十八日夜集范長康拜石軒

二十九日晦連日俱暖與同年曹平子圖扇題云有酒  
陽暑塊者堪寫石有節目勁挺者堪寫寒林文思鬱  
勃者堪寫煙雲草樹曾吞雲夢八九者堪寫沙水渺  
迷

十二月朔日陳白石攜示宋魏鶴山手錄渠陽讀書雜

鈔字如半菽精繁有柳法楷勻細潔白前云起寶慶三年四月後硃筆注云咸淳癸巳臘月傳與劉養源密記密者元周密公謹也有印記四一周密章一華不注山人一公謹父一鐘鼎文不知謂何

二日

三日陰晦

四日細雨作祭親家翁吳江沈大中丞太素公文太素名季文丁丑進士起家工部郎歷閩臬齊晉監司衡文秦中陟齊藩長以中丞出撫河南告歸捐館舍幼女字亨兒以是月之八日往葬吳縣上方山遣兒挽紼附以奠章

五日晚霽夜赴項楚東別駕招同坐者許靈長學博孫  
鼎石萬戶有歌舞侍子妍妙者紫煙春暉寒芬秋聲  
數人紫煙尤所篤幸者也徵余詩余戲揮一律云歌  
舞當場第一仙水晶簾影妬嬋娟低腰乍似迎風柳  
瞥目渾疑出水蓮籠極不須愁曲誤羞多翻自取人  
憐夜來衫袖襤褸甚偷伴撚毬一醉眠

六日項于王招飲糊舫岳之律昆季有項孟璜在坐

七日寒

八日甚寒

九日雪

十日霽

十一日寒雨蕭然昨夜霜月滿庭無纖翳陰晴難料若此

十二日雨竟日不止氣候不甚寒似正月下旬

十三日雨雪雜樹

十四日晴雪融滴瀝有客饋余舒鳧舌百枚想其呬引清流唼喋蘋藻於遙沙闊浦閒可望不可卽何事而舉族見俘競拔舌以供酒人嚙嚙也是日梅蕾放白杭蘭微坼隱隱香撲衣袂爲之傾一壺

十五日復雨竟日

十六日雨歇至夜復雨

十七日雨竟日

十八日陰晦

十九日晴松江年家沈石樓侍御子名士棟者來謁出  
觀宣廟賜其先世沈學士民則諱度者御製醉太  
平詞二首睡起詩一首御畫鸚鵡龍眼一幅三春  
暮久晴一雨動歡聲如膏潤物總敷榮動吾民喜慶  
秀添麥隴苗新盛紅垂柳檻花交映綠舒荷沼葉初  
生盡道是豐年好景濃雲散雨收花苑內鳴鳩曉  
來喜見日光浮暖融融永晝麥苗潤澤添清秀榴花  
溼映紅光溜農夫鼓舞盡謳歌是處慶豐年醉酒

宣德戊申四月九日書

廣運之寶

賜翰林學士沈度

睡起詩

真珠簾外薰風起青瑣窗前半夢醒寶鼎

散煙香細細石泉落澗響泠泠閒看古畫消長日旋  
煮新茶解宿醒頗覺襟懷清似水數聯吟罷不勝情

宣德戊申五月望日書 賜右庶子沈粲

龍眼雙鸚圖 宣德二年御筆 賜學士沈度

右圖迺 章皇帝御筆宣德丁未賜先臣學士絹用  
內府所藏色白細潤可鑑廣二尺有二長三尺有五  
所圖爲龍眼色黃鸚鵡二色朱神采生動迥異凡染  
御款十一字御篆曰雍熙世人視國寶差小猗歟休  
哉當 宣廟朝正偃武脩文日也潤飾太平萬幾餘  
暇留神翰墨先學士以書受知暨先臣少卿兄弟並  
膺殊眷若此繇今想之真可謂雍熙盛世矣萬厯三

十年春正月望日七世孫御史臣時來謹識 時來  
者卽余同年石樓君也與余同觀政通政司每早衙  
列坐右廡仰視大銀臺判牒至日卓午方得散去團  
聚無事因狎語終日相樂也無何各授職石樓以大  
行擢御史巡視居庸紫荆山海等關有聲俄而捐館  
人謂君豪飲竟罹酒禍不竟其抱傷哉三子伯仲繼  
歿士棟其季也

二十日晴

二十一日雨府中奉到余乞養疏部覆云爲照本官蓼  
莪輟誦菽水嬰情依八旬之父而子然一子委難爲  
絕裾之行愛一日之養而抗志三公宜遂其陟岵之



願據其辭榮而重本必能移孝以爲忠既經該司查  
與例合又有同鄉官結勘前來相應覆 請合候  
命下容本官在籍終養吏部案候親終之日給文赴  
部聽用等因萬厯三十九年十月初五日具題本月  
初九日奉 聖旨是欽此

二十二日風而寒

二十三日霽村莊紅白梅開盛

二十四日雪點洒漸

二十五日雨亭午雨歇鳥聲甚繁枯草復萌泥融地溼  
宛然仲春之初不知其爲窮冬也

二十六日至新豐送黃侍御貞所公殯回棹東風甚駛

二十七日陰晦

二十八日霽眉眼豁如

二十九日

三十日

味水軒日記卷三